

Nan Namangulun Tudo' Paul I Timothy (1 Timothy)

¹ Hituwen tudo' ya nalpu i ha'on an hi Paul an apostoles Jesu Kristu an e mangipa'innilah a'atna te pinto'a' i Apu Dios an Mangihwang i dita'u hinan dusana ya hi Jesu Kristu an hiyay gapunan waday namnamaon ta'un pi'taguwan ta'uh pidwana. ² Hituwey tudo'un he"a Timothy an ibilang'uh imbabale' an gapuh nangunudam hinan tudtudun inunud'u.

Hanat malinggop'a ya minaynayun i he"a nan homo' Apu Dios an hi Ama ta'u ya nan Ap'apu ta'un hi Jesu Kristu.

Hay Tugun Paul Hinadan Nibahoy Tutududa

³ Hay imbaga' i he"ah nakaka' hinah ad Epesus hi umaya' hi ad Masedonia ya hiya boy ibaga' i he"ah ad uwani an mahapul an umohnong'ahnah ad Epesus ta way atom an manugun hinadan mangitanudduh nibahon tudtudu ta idinongda. ⁴ Te danaen itudtududan a"apoh hidin nadne ya nan tanontonondan a'at di a'ammod hidin nadne an uhu'uhuhonda ya gumalat hi pun'a'ahhiyanda. Ya ma"i'd ha ibod-dangnah nan e umong'ongngalan di pangulugda ta wan atonda nan pohdon Apu Dios. ⁵ Hay gapunah pangituguna' ituwe ya ta mumpopo-hhodan ta'un namin an gapuh nan immannung an pangulug ta'un Jesu Kristu. Te madinol ta'un

ma"i'd ha bahul ta'u hi manandih nan niyatan ta'un Apu Dios an gapuh nan naminhod ta'un mangat hinadan pohdona. ⁶ Te danae'en e tumanudduh nibahho ya ma"i'd ha hunung nan dakol an eda ibagabaga. ⁷ Ya pohdonda'eh'an diday muntutuduh nan tugun Moses mu dee mannot an adida ma'awatan di a'at nan eda itudtudu ya nadan udum an eda ibagabaga.

⁸ Innila ta'u an nan tugun Moses ya maphod mu gahin di ma'awatan ta'u nan nipto' an pinhodnan ibaga. ⁹ Te nan tugun Moses di mangipa'innila hi a'at di bahul. Ya bokon hanadan maphod di pangatday tugunona te hanadan mungngohe ya nadan adi maphod di pangatda ya nadan ma"i'd ha takutdan Apu Dios an attaondan bumanahubbahul ya nadan mamateh a'ammodda ya nadan udum an pamaaggon pimmeda ¹⁰ ya nadan mangilo' hi bokonda ahawa ya nadan mangat hi nagaga"iho an umat hinadan linala'in ilo'day ibbada bon linala'i ya nadan tatagun e mangihbut hi ibbadan tagu ya nadan mangibagah agge immannung ya an namin nadan adi mangunud hinan nahamad an tudtudu ¹¹ an hidiye nan iphodon ta'u an inat Jesu Kristu an impa'innilan nan na'abbaktun Dios an hiya nan alpuwan di nahamad an amlong. Hituwe nan inyukodnan ha'on ta e' itudtudu.

Hay Nammo'an Apu Dios I Paul

¹² Ongal di punhanaa' hinan Ap'apu ta'un hi Jesu Kristu an nangdat hi abalina' an mangat

hinadan ipatamuna. Ya munhanaa' bo te imbi-
 langa' hi na'na'unnud ta hiya nan pinto'a' hi ohah
 nadan puntamuwona ¹³ an ta'on on nunhiglan
 adi maphod di e' hinapihapit hi a'atna. Ya
 mabungota' an tagu ta pinaligat'u nadan kimmu-
 lug i hiya. Mu munhanaa' ta himmo'a' i Apu
 Dios an gapu ta hidin aggeya' ni' kimmulug i
 Kristu ya agge' innila an nibahho nadan ato'ato'.
¹⁴ Mu ongal di homo' nan Ap'apu ta'un ha'on
 ta binoddangana' ta nawaday pangulug'u ya
 pamhod'uh ibba' an tagu. Te athituy ma'at
 i dita'u an gapuh pangulug ta'un Jesu Kristu.
¹⁵ Ta immannung an hi Jesu Kristu ya immalih
 tun luta ta ihwangna nadan nun'abahulan ta
 way atondan mi'tagun hiya. Unhaot patiyon
 di an namin di tagu. Ya teen ha'on di oha
 an nunhiglan na'bahhulan. ¹⁶ Ya maphod ta
 himmo'a' nimpe i Apu Dios ta nan inatnan ha'on
 ya hidiyey mangipatigo an hi Jesu Kristu ya
 hadhaddonay kumulugan nadan nun'abahulan
 an umat i ha'on. Ta panginnilaan di tatagu an
 ta'on on dida ya mabalin an mi'tagudan hiyah
 munnananong hi'onda kumulug i Jesus.

¹⁷ Ot hi Apu Dios ya abuh di nanongnah
 madayaw ya mipabaktu. Te hiya ya Patul an
 ma'id ha pogpog di pun'ap'apuwana ya adi
 matigo ya nanongnay a'atna te hiya ya ammunay
 nahamad an Dios. Amen.

*Hay Nangihamadan Paul An Nanugun I Timo-
 thy*

¹⁸ Danaen intugun'un he'an imbabale'
 Timothy ya hiya tuwaliy imbagan nadan

nangipa'innilah nan pohdon Apu Dios i he"ah atom ta wan ihamadmun labanon nadan adi maphod ¹⁹ ta wan minaynayun nan nahamad an pangulugmu ya nan pangatam hinadan innilam an pohdon Jesu Kristu hi atom. Ta adim paton hinadan udum an ta'on on inniladan adi miyunnudan hinan pohdon Apu Dios nan ninomnomdan aton ya atonda damdama ta hidiyey namahbah hi pangulugda. ²⁰ Hiyah naey na'at i da Haymenyus i Alexander ta hiya nan inyukod'u mo dida i Satanas. Ta hiyay mamalpaligat i dida ta matitilogda ta wan idinongdan mamihupihul i Apu Dios.

2

Hay Mahapul Hi Aton Nadan Tatagun Apu Dios

¹ Hay ma'ahhapul ahan hi aton ta'u ya idasadasalan ta'un namin di tatagu ta wan hom'on Apu Dios dida. Ya nanongna bon munhana ta'un Apu Dios hinadan boddangnan dida. ² Ya mahapul bon idasadasalan ta'u nadan patul ya an namin nadan nabaktun ap'apu ta maphod di panggubilnuda ta wan ma'id ha mangipagol i dita'un kimmulug hi e ta'u pangunudan hinan pohdon Apu Dios an nipto' an pangat. ³ Ot maphod on athidiy idasal ta'u te hidiyey umipa'amlong i Apu Dios an nangihwang i dita'u hinan dusanan dita'u. ⁴ Te hay pohdona ya an namin di tagu ya innilaonda ya abulutonda nan nipto' an tududu ta wan mi'tagudan hiyah munnananong. ⁵ Te oha ya abuh hi Apu Dios an nahamad an Dios ya oha bo ya abuh hi

Jesu Kristu an mabalin an mangihapit i dita'un tatagu i Apu Dios an hiya nan numbalin ni' hi tagu. ⁶ Te hidin nadatngan nan ninonomnom Apu Dios an umaliyan Jesu Kristu ya impa'alina ta inyatenay bahul di tagu. Ta hituwey panginilaan an pohdonan mi'tagudan namin di tatagu i hiyah munnananong. ⁷ Ot hiyah tuwey gapunah namto'anan ha'on hi apostolesna ta e' ipa'innilah tuwen tudtuduh nadan bokon Judyu. Ta innilaonda ta wan mi'taguda damdama i Kristu hi'onda unudon nan nipto' an tudtudu. Immannung hituwen inali' an bokon layah.

⁸ Maphod boh on nadan linala'ih nadan ahayuhayupan di mumpangulug i Jesus ya idinongda nadan adi maphod an pangatda ta ihamaddan mundasal an ma'id ha hihiwoda onu bungotdah ibbada. ⁹ Ya maphod boh on nadan binabai ya iphoddan munlubung ta adida umipabain. Mu adi mahapul an punhiglaonday pangiphoddah ibu'da ya adi gahin on mun'usaldah nadan balitu' onu perlas. Ya adi gahin on munlubungdah nadan nun'anginan lubung. ¹⁰ Te hay panginilaan hinan immannung an aphod di binabain kimmulug i Apu Dios ya nan maphod an pangatda.

¹¹ Ya mahapul bo an nadan binabai ya mumpada'ulda ta igongahanda nadan linala'in muntudtudu. ¹² Te adi maphod hi'on nadan binabaiy muntudtuduh nan a'amu'amunganyu ta diday umanhan. Hay maphod ya dindinnonganda ta mundongolda. ¹³ Te hidin nunlumuwan Apu Dios hi hopap di tagu ya hi Adam di namangulun limmuna ot ahi nan babain hi Eba.

14 Ya bokon hi Adam di nabaliyan te nan babain ahawana ta hiyay namangulun numbahul i Apu Dios. 15 Ta gapuh numbahulan Eba ya mumpaligat nadan binabai hi'onda mun'ayyam. Mu ta'on on athidi ya mabalin an pi'taguwon Apu Dios dida hi'onda inaynayun di pagulugda ya pamhoddah ibbada ya nipto' di pangatda.

3

Hay A'at Di Mangipangpanguluh Kimmulug I Apu Dios

1 Immannung nan ungganda ibaga an alyonday, Nan tagun pohdonan hiyay mangipangpanguluh nadan ibbanan kimmulug ya maphod hidiyen ninomnomnan aton. 2 Mu mahapul an nan mangipangpanguluh nadan ibbanan kimmulug ya maphod di pangatna an ma"i'd ha pamihulan di tatagun hiya. Te adina iluktap di ahawana ya innilanan mangono'nong hi panapitna ya pangatna ya ma"apnga hi'on waday humawwang hi baleda. Ya abalinanan muntuddu. 3 Ya ma"i'd ha abutongana ya adi hi kittang on bumungot te ma'ule. Ya adi hi kittang on mi'hannu ya bokon hay pihhuy gagamamana. 4 Ya gahin di innilanan mangipapto' hi nunhituwana ya innilana bon muntugun hinadan imbabalena ta na'na'unnudda. 5 Te onha adina abalinan an mangipapto' hi nunhituwana ot nganney atonan mangipapto' hinadan kimmulug i Apu Dios. 6 Ya hanat bokon hanan hiyah kimmulug di pot'onnyuh mangipangpangulu te hinuddum ya hidiyey gumalat hi pumbaktuwana ta lummuh adusaana an umat hinan na'at i Satanas. 7 Ya

mahapul bon ta'on on nadan agge kimmulug ya maphod di ibagadah a'atna. Te onha adi athidi ot lo'tat ya waday akhupandah pumbahulana ta mibabain ta hidiyey pangabak nan diyablun hiya te ayna kinna.

Hay A'at Nadan Bumoddang Hinan Mangipangpanguluh Nadan Kimmulug

⁸ Hanada'e damdaman bumoddang hinan mangipangpanguluh nadan kimmulug ya hanat piyalon di tatagu dida te maphod di pangatda ya panapitda. Ya adida uggan mabutong. Ya bokon hay pihhuy gagamgamanda. ⁹ Ya hanat miyunnudan nan pangatda hinan nipa'innilan kinulugda an hapit Apu Dios. ¹⁰ Ta hiya nan mahapul an ihamadyun innilaon di a'atda ta at'ehdin maphod di pangatda ya mabalin an diday bumoddang hinadan mangipangpanguluh nadan kimmulug.

¹¹ Ya atbohdi nadan ahawada an hanat piyalon di tatagu dida te adida e tumtumbu'on di ibbada. Ya mahapul an abalinandan mangono'nong hi panapitda ya pangatda ya waday dinol di tatagu i dida hi an namin an atonda.

¹² Ot hanada'e nimpen bumoddang hinadan mangipangpanguluh nadan kimmulug ya mahapul an adida iluktap di ahawada ya inniladan mangipapto' hi nunhituwanda. ¹³ Te maphod'ey pangatdah nan tamun niyukod i dida ya mipabaktuda. Ya umong'ongngal di dinoldan e muntudtuduh mipanggep i Jesu Kristu.

¹⁴ Intudo"u datuwe an ta'on on ninomnom'un agagga ya umaliya' hina ¹⁵ te alinah waday atak-taka' ya innilam di atom te mahapul an nipto' di aton nadan tatagun nibilang hinan pamilyan Apu Dios. Te dita'un tatagun nan wadawadan Dios di mangipa'innila ya mangita'dog hinan nahamad an tudtudu an umat hinan a'at nan o"ongal an pusti. ¹⁶ Te tun unudon ta'u an ma"i'd ha nipaddungana an agge nipa'innilah din nadne ya alyonay,

Hi Kristu ya numbalin hi tagu ya impa'innilan nan Espiritun Apu Dios di amaphodna ya tinigon nadan anghel ya nipa'innilay a'atnah abobboble ya dakolday kimmulug i hiyah tun luta. Mu ad uwani ya nipabaktuh ad abunyan.

4

Hay A'at Nan Nibahhon Tudtudu

¹ Pohdo' an ipanomnom bo i he'a nan impa'innilan nan Espiritun Apu Dios an alyonay hay umudi ya wadaday udum an mangiwalong hi pangulugda i Jesu Kristu. Te mabaliyandah nan nibahhon tudtudun malpuh nadan didimunyu ² an ipituddudah nadan tatagun nangipa'inghah layah te nadadawoh i didah diyen nibahhon at'attonda. ³ Te hay itudduda ya alyonday bahul i Apu Dios nan e alahinan ya hay panganan hinadan udum an makan. Mu adi athidi te hay makan ya limmun Apu Dios ta anon di tatagu. Ot dita'un kimmulug an nanginnilah nan nahamad an tudtudu ya munhana ta'uh nangdatan Apu Dios hinadan makan ta anon

ta'u. ⁴ Te an namin nadan limmun Apu Dios ya maphod an adi mapaniyo hi'on munhana ta'u i hiyah nangdatana. ⁵ Ta hiya nan an namin di makan ya mabalin an anon ta'u an gapuh pangidasalan ta'un miyunnudan hinan imbagan Apu Dios.

Hay A'at Di Maphod An Baal Jesu Kristu

⁶ Hanat ipa'innilam danaen imbagabaga' hinadan ibba ta'uhna te athinay a'at di maphod an baal Jesu Kristu an nanongnan ada'adalona nan mitudtudu an mangipihamad hi pangulug. ⁷ Mu tigom ta adim hanguton nadan ma'id ha hunungnan a'apoh hidin nadne an ma'id ha boddangdah nan umongngalan di pangulug. Ta hay maphod ya inaynayunmun ipa'inghan mangat hinadan miyunnudan hinan pohdon Apu Dios ⁸ an umat hi pangipa'inghaan tun adol an muntamu. Mu nahamhamad nan e ta'u pangipa'inghaan an mangun'unud hinadan tugun Apu Dios te iphodan ta'uh inggana an adi ammunah ad uwani.

⁹ Hituwen inali' ya immannung ot maphodot on unudon di tatagu. ¹⁰ Ot humlu ta'un e mangipa'innilah a'at Apu Dios an ta'on on naligat ya mundinol ta'uh nan wadawada an Dios an hiya nan mangipappapto' hi tatagu an namamah nadan kimmulug i hiya. ¹¹ Ot datuwey ituddum hinadan tatagu ta unudonda. ¹² Mu halipodpodom di pangatmu ta mabalin an he"ay pangiyunnudan nadan ibba ta'un kimmulug i Apu Dios an gapuh nan maphod an atom an umat hi panapitmu ya pamhodmuh ibbam an

tagu ya nan pangulugmu ya nan maphod an punnomnommu. At'ehdiy pangatmu ya ma'id ha atondan mamihul i he"a an ta'on on'a unga.

¹³ Hay maphod boh atom ta ingganah ona' umali ya ibahabaham nan hapit Apu Dios hinadan a'am'amunganyu. Ya ituddum di pinhodnan ibaga ta ma'awatanda ta unudonda.

¹⁴ Ya hanat adim higanan an mangat hinan abalinam an indat Apu Dios an impa'innilan nadan mangipangpanguluh kimmulug hidin nangiha'mowandah ta'ledan he"a hi nangidasalandan he"a. ¹⁵ Ot hanat atom di abalinam an mangat i datuwen imbaga' ta wan tigon di tatagu an umong'ongngal di pangulugmu. ¹⁶ Ya hanat halipodpodom di pangatmu ya ta'on on nadan itudtudum. Ya inaynayunmun mangat i datuwen imbagabaga' te atom'ehdi ya wadaday maboddangan ta mi'taguda i Apu Dios an umat i he"a.

5

Hay Intugun Paul Hi Aton Timothy Hinadan Kimmulug

¹ Hay oha bon itugun'un he"a ya hanat adim ihingal nadan amamma hi'on waday nibahawanda. Maphod on pa'ulayam dida an ay hanan ammodmu dida. Ya atbohdih nadan mumpangilog an linala'i an hanat ibilangmu didah i'ibam. ² Ya hanada'en ininna ya ibilangmu didah hi inam. Ya nada'en binabain mumpangpangngilog ya ibilangmu damdama didah i'ibam ta maphod di punnomnommu i dida.

³ Ya hanat tigom ta ipapto'yu nadan nabalu an ma"i'd ha mangipapto' i dida ta da'yuy mangdat hinadan mahapulda. ⁴ Mu wadada'ey i'imbabaleda onu apapuda ya maphod on innilaonda an diday mangipapto' hinadan a'ammodda ta ay hidiyey paddungnay pumbayaddah nangipanapto'an di a'ammodda i dida ot umipa'amlong i Apu Dios hidiyen atonda. ⁵ Ya hanan imbaga' an nabalu an ma"i'd attog ha bumoddang i hiya ya hi Apu Dios di pundinolana ta hiya nan adina higanan an dumasadasal an mumpaboddang i hiya hi ahodohodom ya abigabigat. ⁶ Mu nadan udum an on nan umipa'amlong hi nitaguwandah tun lutay nomnomnomonda ya ma"i'd ha niyatanda i Apu Dios ta hiya nan hay panigon Apu Dios i dida ya nateda an ta'on onda matagu. ⁷ Ot danaey itugunmuh nadan mumpangulug ta innilaonday nipto' hi atonda ta wan ma"i'd ha pamihulan di tatagu i dida. ⁸ Te onha waha taguh adina ipapto' di tulangna an namamah nan pamilyana ya ma"i'd ha hilbin di pangulugna. Ta udu'duldaot bo eh'a nadan agge kimmulug mu hiya.

⁹ Ya hay mabalin hi iddumyuy ngadanah nan nitudo'an di ngadan nadan nabalu ya mahapul an nan mahuluk hi nanom (60) di tawona. Ya mahapul an naminghan an nalahin ¹⁰ ya maphod di ibagan di tataguh a'atna an umat hinan maphod an panalipodpodnah imbabalena hi'on waday imbabalena. Ya ma"apnga hinadan humawang hi balena an namamah nadan tatagun Apu Dios. Ya bumoddang hinadan maligatan ya nanongnay naminhodnan mangat hinadan

maphod.

¹¹ Mu hanada'en nabalun an aggeda ni' na'ininna ya adiyu iddum dida. Te alinah maluman di punnomnomda ya iwalongda nan imbagadan punhilbiyanda i Kristu ta malahinda. ¹² Ya hidiyey gumalat hi pumbahulanda te iwalongda nan imbagadah atonda. ¹³ Ya bokone bo ya alinah humigada ta palpaliwanda an e mi'ib'ibbun hi abalebale. Ta tumtumbu'onday ibbada ya mi'bi'biyangdah at'atton di udum an tatagu. Ya lo'tat ya ta'on on hanadan adi maphod an mibaga on ibagada. ¹⁴ Ta hiya nan hay ibaga' ya udu'dulnah on mumbintan nadan nabalun an agge ni' na'ininna ta mun'imbabaleda ta waha ipapto'da ya ta wan bokon diday gumalat hi pamihulan nadan ma'hihhiwo i dita'u. ¹⁵ Te ta'on on ad uwani ya needahnay udum an nabalun an nangiwalong hi pangulugda ta hi Satanas di unudonda. ¹⁶ Ot pidwo' bon ibaga an hanadan kimmulug an wadaday tulangdah nabalun ya mahapul an diday ukod an bumoddang i dida ta adida iyukod hinan simbaan ta way aton nan simbaan an bumoddang hinadan udum an nabalun an ma'id ha bumoddang i dida.

Hay A'at Nadan Mangipangpanguluh Nan Simba'an

¹⁷ Hay oha bo ya nomnomnomonyu ta ong'ongngal di midat* hinadan linala'i an maphod di atonda an mangipangpanguluh

* **5:17** 5:17 Hay alyon di udum an Biblia hinan midat ya punlispitu ya nadan udum'e ya nan duwa an bino'la ya punlispitu.

nadan kimmulug an namamah nadan mahlun muntudtuduh hapit Apu Dios. ¹⁸ Te diday ni'aligan nan impitudo' Apu Dios an alyonay, Adiyu bunguton di to'on nan baka hi'on mun'ilik ta anona dohah nadan ma'ilik. Ya alyona boy, Nan muntamu ya mahapul an midattan hi bo'laona. ¹⁹ Ya alina'e hi waday ipabahuldah nan mangipangpangulun da'yun kimmulug ya tigonyu ta adi namaag ya pinatiyu te gahin on wadada i da'yu ha duwa onu tuluh muntistigu an immannung. ²⁰ Mu alina'e hi immannung an numbahul ya ihingalyu hi'on ayu na'amung ta wan pangitigan di udum ta adida aton di athidi.

²¹ Ya ibaga' bon he"a Timothy ta ihamadmun un'unudon danaen intugutugun'un he"a ta ma'id ha pangipangngelam. Te hi Jesu Kristu ya hi Apu Dios ya ta'on on nadan anghelna ya dingngoldah tuwen panugun'un he"a.

²² Ya hanat adi namaaggon pinto'yu nadan mangipangpanguluh nadan kimmulug on inha'moyuy ta'leyu i dida ta idasalanyu dida te mahapul an innilaonyu ni' di a'at nan ohan tagu ya ahi mabalin an pot'onnyu. Te logmonyu'e ya mi'bahul ayu hi'on waday atonah adi maphod. Ot hiya nan halipodpodonyu ta ma'id ha atonyuh adi maphod.

²³ Ya mabalin an uminum'ah kittang hi bayah ta ti'dona nan uggan humakit hi putum.

²⁴ Ot hanat nomnomom nan imbaga' hi atonyu an mumpilih nadan mangipangpanguluh nadan kimmulug. Te wadaday udum an tatagu an

on tuwali ma'attigoy pumbahulanda ta hiya nan na'innilaan boy adusaandah udum hi algo. Mu wadada boy udum an adi ma'innilah ad uwaniy pumbahulanda mu lo'tat damdama ya ma'innilaan. ²⁵ Ya atbohdi an wadaday udum an ma'attigo nan maphod an at'attonda. Mu wadada boy maphod an aton di udum an adi ma'innilah ad uwani mu ma'innilaan hi udum hi algo.

6

Hay Maphod Hi Aton Nadan Himbut

¹ Ya pohdo' bon tugunom nadan kimmulug an himbut ta lispituwonda ya un'unudonda nadan ud himbut i dida. Ta wan ma'id ha gumalat hi pamihulan di tatagu hinadan tatagun Apu Dios ya ta'on on nan tuguna an itudtudu ta'u. ² Ya hanada'en himbut an kimmulug i Apu Dios nadan ap'apuda ya hanat adida alyon hi ta'on on adida un'unudon dida ot ibbadan kimmulug. Mu hay maphod ya iyal'alanan maphod di atondan munhilbin dida te ibbadan kimmulug nan ud himbut i dida.

Ot hanat datuwey ipa'anhanmun itugun i dida.

Hay A'at Nan Nibahhoy Itudtuduna

³ Wadaday udum an nat'on di itudduda an agge niyunnudan hinan un'unudon ta'un tudtudun nan Ap'apu ta'un hi Jesu Kristu ⁴ an dadiye

nadan mangipabaktuh adolda ya agge nanginginilah nan nahamad an tudtudu. Te hay pinhodda ya mi'yahhiyanda hinan mipanggep hinan hapit Apu Dios ta hidiyey gumalat an waday munhin'a'amoh ya humihiwoh ibbada ya wadada mo ahan di mangibagah adi maphod ta ma'id mo ha dinoldah hinohha. ⁵ Ya umana'ahhiyanda te hiyah diyey a'at nadan adi maphod di punnomnomda an dida nadan nanginganuy hinan nahamad an tudtudu. Ya hay punnomnomda ya gapuh nan tudtudun Jesus ya kumadangyananda.

⁶ Mu immannung an nan mundinol i Apu Dios ya mapnek hinan indat Apu Dios an wadan hiya ta hiya nan mibilang hi kadangyan. ⁷ Te hidin niyayyaman ta'uh tun luta ya ma'id ha inodnan ta'u ot atbohdi atayan ta'u an ma'id ha odnan ta'u. ⁸ Ta hiya nan mapnek ta'u hi'on waday anon ta'u ya ilubung ta'u. ⁹ Te nan tagun hay kinadangyan di gagamgamana ya lo'tat ya mabaliyan an mangat hi adi maphod. Ta atona nadan pohpohdona ta hidiyey abahbahan di itaguwanah tun luta ya ta'on on nan itaguwanah pidwana. ¹⁰ Te nan pangamgaman hi pihhuy almuwan nan dakol an adi maphod an umat hinan na'at hinadan udum an nangiwalong hi pangulugda. Ta hay numbalinan diyen inatda ya ongal di eda inomnoman.

Hay Na'udin Tugun Paul I Timothy

¹¹ He'a'e Timothy an munhilbin Apu Dios ya hanat inaynayunmun halipodpodon ta adim aton nadan adi maphod. Ta hay nomnomnomom

ya hay panginaynayunam hinan pangulugmu ta mipto' di pangatmun miyunnudan hinan pohdon Apu Dios. Ta minaynayun di pamhodmu ya ulem hinadan ibbam. Ya ta wan itpolmu nadan ma'at i he"a. ¹² Ot hanat ihamadmun mangun'unud i Apu Dios an ta'on on naligat ta umat'ah nan tagun mi'yabbak. Ot waday lagbum an hidiye nan pi'taguwan hi munnananong te hidiyey gapunah namto'an Apu Dios i he"a hidin nangipa'innilaam hinan a'at di pangulugmuh nadan dakol an tatagu. ¹³ Ot hi Apu Dios an alpuwan di itaguwan ya hi Jesu Kristu an agge timmakut an nangipa'innilah a'atnah din nanu-malyaan Ponsio Pilatu ya innilana tun ibaga' i he"a. ¹⁴ Ot hanat halipodpodom tun nitugun ta ma"i'd ha pamihulandan he"a ta ingganah madatngan nan pumbangngadan nan Ap'apu ta'un hi Jesu Kristu. ¹⁵ Hidiyen umaliyana ya gintud Apu Dios an hiya nan ma"aphod ya na'abbaktun Ap'apu. Ya hiya boy Patul di apatupatul ya Ap'apun di a'ap'apu. ¹⁶ Ya hiya nan ma"i'd ha hipuna ya ma"i'd ha pogpogna. Ya ma"i'd ha taguh mabalin an mihaggon i hiya te nunhiglan humili nan awadana ta ma"i'd ha taguh mabalin an manigon hiya. Ya hiya ya madayaw hi inggana te ma"i'd ha nipaddungan nan abalinana. Amen.

¹⁷ Ya tugunom bo ta'wa nadan kakadangyan hitun luta ta wan adida mumbaktu ya bokon nan kinadangyanda an nalakan mama"i'd di pundinolanda ta waot an hi Apu Dios te hiyay mangdat hi an namin an pun'am'amlongan ta'u. ¹⁸ Ya ibagam bo i dida ta wan nan

maphod di iyal'aladaot an aton an umat hinan pammo'andah nadan tatagu ta adida ma'ukuh.

¹⁹ Ot atonda'ehdi ya ay ma'ma'amung hi ad abunyan nan nahamad an kinadangyanda an nan pi'taguwandah munnananong.

²⁰ Ot he"a Timothy ya mahapul an ihamadmun mangat hinan inyukod Apu Dios i he"ah atom. Ya adim hanguton nadan hapit an ma"id ha niyatana i Apu Dios ya nan alyon di udum hi nahamad an adal mu onnot bokon. ²¹ Te hiyah nae nan inunud nadan udum ta hiya nan nibahhoy pangulugda.

Ot hanat nan homo' Apu Dios di minaynayun i he"a.

Nan Hapit Apu Dios
Ifugao, Amganad: Nan Hapit Apu Dios Bible

copyright © 2014 Wycliffe Bible Translators, Inc.

Language: Ifugao, Amganad

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

8a82f002-75c6-5d1c-87e7-2ca29bd67aec